

არასამეწარმეო (არაკომერციული) იურიდიული პირის
“საქართველოს პროფესიონალ ქიმიკოსთა ასოციაციის”

წესდება

**მიღებულია საქართველოს პროფესიონალ ქიმიკოსთა
ასოციაციის დამფუძნებელ კრებაზე
2011 წლის 10 მარტი**

მუხლი 1. ზოგადი დებულებანი

1.1 საქართველოს პროფესიონალ ქიმიკოსთა ასოციაცია (ინგ. Association of Professional Chemists of Georgia) (შემდგომში – ასოციაცია) არის სამეცნიერო-საგანმანათლებლო, არასამთავრობო ორგანიზაცია.

1.2 საქართველოს პროფესიონალ ქიმიკოსთა ასოციაცია წარმოადგენს საქართველოს სამოქალაქო კოდექსით განსაზღვრულ კერძო სამართლის არასამეწარმეო იურიდიულ პირს. მისი ორგანიზაციულ-სამართლებრივი ფორმაა ასოციაცია (კავშირი). ასოციაცია იურიდიული პირის სტატუსს იძენს მისი სახელმწიფო რეგისტრაციის მომენტიდან და წესდებით გათვალისწინებული ამოცანების შესრულებისას მოქმედებს საქართველოს კონსტიტუციის, საქართველოს სამოქალაქო კოდექსის, სხვა საკანონმდებლო აქტების, წინამდებარე წესდებისა და საერთაშორისო სამართლებრივი ნორმების საფუძველზე.

1.3 ასოციაცია დამოუკიდებელია და მის საქმიანობაში ჩარევა ან რაიმე ზემოქმედების მოხდენა დაუშვებელია, გარდა საქართველოს კანონმდებლობით გათვალისწინებული შემთხვევებისა.

1.4 საკუთარი მიზნებიდან გამომდინარე, ასოციაცია მოქმედებს როგორც საქართველოს მთელ ტერიტორიაზე, ასევე მის ფარგლებს გარეთ.

1.5 ასოციაციას გააჩნია დამოუკიდებელი ბალანსი, მრგვალი ბეჭედი საკუთარი სახელწოდებით, საანგარიშსწორებო და სხვა სახის ანგარიშები (მათ შორის სავალუტო) საბანკო დაწესებულებებში როგორც საქართველოში, ისე საზღვარგარეთ და იურიდიული პირის სხვა რეკვიზიტები.

1.6 ასოციაციის დავა სხვა იურიდიულ პირებთან და მოქალაქეებთან განიხილება საქართველოს კანონმდებლობით განსაზღვრული წესით.

1.7 ასოციაცია არ ახდენს დისკრიმინაციას სქესის, რასის, ფერის, ნათესაური სტატუსის, კლასის, რელიგიური, ეთნიკური ან ნაციონალური წარმოშობის, სექსუალური ორიენტაციის, ეროვნების, სოციალურ-ეკონომიკური შესაძლებლობების, უნარშეზღუდულობის ან სამედიცინო მდგომარეობის მიხედვით.

1.8 ასოციაცია იქმნება განუსაზღვრელი ვადით.

1.9 ასოციაციის იურიდიული მისამართია: თბილისი, დიდი დილომი, ი. პეტრიწის ქ. №17ა ბინა 25.

მუხლი 2. ასოციაციის მიზნებია:

2.1 ასოციაციის წევრების ხელშეწყობა და მათი ძალისხმევის გაერთიანება, რათა განხორციელებულ იქნეს ქიმიის, ქიმიური ინჟინერინგისა და მონათესავე დარგებში დასაქმებული მეცნიერების, ინჟინრების, სპეციალისტთა პროფესიონალური და შემოქმედებითი ინტერესების უზრუნველყოფის პირობა, მათი მაღალი სოციალური სტატუსის შექმნა და მხარდაჭერა.

2.2 ქიმიისა და ქიმიური ინჟინერინგის დარგების ფართო პოპულარიზაცია.

2.3 მჭიდრო თანამშრომლობა საჯარო და კერძო სკოლებთან ქიმიისა და ქიმიური ინჟინერინგის დარგების ფართო პოპულარიზაციისა და მათი პროფესიული ორიენტაციის განსაზღვრის ხელშეწყობის მიზნით.

2.4 ქიმიისა და ქიმიური ინჟინერინგის დარგებში მომუშავე მეცნიერთა და ინჟინერთა მიღწევების პოპულარიზაცია.

2.5 მეცნიერთა ჯგუფებსა და მეწარმეთა კონსოლიდაციის ხელშეწყობა.

2.6 ასოციაციის და მათი წევრების უფლებების დაცვა და სათანადო სამართლებრივი და სოციალური გარანტიების შექმნის ხელშეწყობა, რაც უზრუნველყოფს მათ პროფესიონალურ საქმიანობას.

2.7 თანამედროვე სტანდარტების შესაბამისი პროფესიონალური ეთიკის ჩამოყალიბება.

2.8 ხელშეწყობა სამეურნეო კომპლექსში პროგრესული, ეკოლოგიურად სუფთა ტექნოლოგიებისა და ტექნიკური საშუალებების შექმნასა და დანერგვაში, რომელიც იძლევა წარმოების ეფექტურობის გაზრდის საშუალებას, მეცნიერებატევადი, პრინციპულად ახალი სახის პროდუქციის გამოშვების შესაძლებლობას ნაკლები შრომითი და საწარმოო დანახარჯებით, სამამულო-სამეცნიერო ტექნიკური ბაზის განვითარებას მსოფლიო მიღწევათა დონეზე.

2.9 მონაწილეობა მიმდინარე და უახლესი პერიოდისათვის ქიმიური მეცნიერებებისა და ქიმიური ტექნოლოგიის სხვადასხვა დარგის სამეცნიერო-ტექნიკური პოლიტიკის განსაზღვრისა და ძირითადი მიმართულებების დადგენაში; სამეცნიერო-კვლევითი სამუშაოების დაგეგმვასა და რეალიზაციაში.

2.10 მონაწილეობა როგორც საქართველოს, ისე სხვა ქვეყნის უმაღლესი სასწავლებლების ინსტიტუციური და პროგრამული აკრედიტაციის პროცესში, ასევე კონკრეტული სასწავლო-სამეცნიერო-ტექნოლოგიური საკითხების შეფასებასა და აუდიტში.

2.11 მსხვილი პროექტების გარშემო საზოგადოებრივი აზრის გამოვლენა და ჩამოყალიბება, როგორც დარგის საწარმოებში, ისე სასწავლო-საგანმანათლებლო დაწესებულებებში. პერსპექტიული პროექტების მხარდაჭერა და შეძლებისდაგვარად მათი ავტორების წახალისება.

2.12 მეცნიერებისა და ტექნიკის მიღწევების, მოწინავე საწარმოო გამოცდილების პროპაგანდა.

2.13 საქმიანი, შემოქმედებითი და მეგობრული კავშირების განვითარება სხვა ქვეყნების პროფესიულ კავშირებთან, ასოციაციებთან, საზოგადოებებთან, უნივერსიტეტებთან, სამეცნიერო ცენტრებთან, საწარმოებთან.

2.14 მონაწილეობა საქართველოს ეკონომიკური დამოუკიდებლობისა და საბაზრო ურთიერთობების დამკვიდრებასთან დაკავშირებული საკითხების გადაწყვეტაში.

2.15 მონაწილეობა სამეცნიერო და საინჟინრო კადრების, სპეციალისტების პროფესიული ცოდნის ამაღლებაში.

2.16 ქიმიური მეცნიერებებისა და ქიმიური ტექნოლოგიის დარგში კონსულტაციების გაწევა.

2.17 ეროვნული მეცნიერებისა და ტექნიკის ისტორიული წარსულის შესწავლა და პროპაგანდა. პრაქტიკაში ქართული ტექნიკური, კერძოდ ქიმიისა და ქიმიური ტექნოლოგიის ტერმინოლოგიის დამკვიდრება.

2.18 ხელი შეუწყოს ქართულ საზოგადოებაში სამართლებრივი თვითშეგნების დონისა და კანონის პატივისცემის ამაღლებას, დახმარება გაუწიოს საქართველოში დემოკრატიული ღირებულებების დამკვიდრებას და სამოქალაქო საზოგადოების ჩამოყალიბებას.

2.19 ასოციაციას შეუძლია აწარმოოს ყველა შესაძლო საქმიანობა, რომლებიც არ ეწინააღმდეგება საქართველოში მოქმედ კონსტიტუციასა და კანონებს.

მუხლი 3. საქმიანობის ფორმები

3.1 ასოციაცია დასახული მიზნების მისაღწევად, საკუთარი უფლებამოსილების ფარგლებში და საქართველოს კანონმდებლობის სრული დაცვით:

- (a) ატარებს სიმპოზიუმებს, კონფერენციებს, სემინარებს, ტრენინგებს, ლექციებს, შემოქმედებით დისკუსიებს. აგრეთვე, საჭიროების შემთხვევაში იყენებს სხვა ფორმებს ისეთი საკითხების განხილვისას, როგორცაა დარგის თანამედროვე სამეცნიერო და საინჟინრო-ტექნიკური კონცეფციები, უახლესი ტექნოლოგიები, პროექტები, მეცნიერებისა და ტექნიკის განვითარების ახალი მიმართულებები და ა.შ.;
- (b) აყალიბებს წინადადებებს დარგის საწარმოების სოციალურ-ეკონომიკური განვითარების გეგმების, მათი ტექნიკური განახლების პროგრამების და მოქმედ საწარმოთა რეკონსტრუქციისა და ტექნიკური გადაიარაღების პროექტების საზოგადოებრივ ექსპერტიზას;
- (c) დახმარებას უწევს სამეცნიერო-ტექნიკური ხასიათის გამოფენების, კონსულტაციების და კონკურსების მოწყობას;
- (d) დახმარებას უწევს სამეცნიერო და შემოქმედებით მივლინებებს საქართველოს და უცხოეთის მასშტაბით, საწარმოო ექსპურსიებს, აგრეთვე სტუმართა მიღებას;
- (e) უზრუნველყოფს საზოგადოების წევრების უფლებებისა და კანონიერი ინტერესების დაცვასა და წარმოჩენას მესამე პირთან ურთიერთობაში;
- (f) ახდენს ასოციაციის წევრების მიღწევების საზოგადოებრივ განხილვას და მათ წარდგენას სახელმწიფო და სახელობით პრემიებზე, ასევე მნიშვნელოვან სამეცნიერო მიღწევებსა და

საინჟინრო ნამუშევრებზე ასოციაციის პრემიების, სტიპენდიების დაწესებას და მინიჭებას, წახალისების სხვა ფორმების გამოყენებას;

- (g) ასოციაცია უფლებამოსილია ქიმიასა და მონათესავე სფეროებში ჩაატაროს კვლევები, და სხვადასხვა ტიპის ინტერაქტიური გამოკითხვები და გამოაქვეყნოს მნიშვნელოვანი შედეგები;
- (h) ასოციაციას შეუძლია წესდებით გათვალისწინებული საქმიანობის განსახორციელებლად საჭიროების შემთხვევაში სახელშეკრულებო საწყისებზე ითანამშრომლოს ნებისმიერ ორგანიზაციასთან, იგი სოციალურად იცავს ასოციაციის წევრებს საბაზრო ეკონომიკის პირობებში, ეხმარება მათ დასაქმებაში და კვალიფიკაციის ამაღლებაში.

მუხლი 4. ასოციაციის წევრი

4.1 ასოციაციის წევრი შეიძლება გახდეს ქიმიის, ქიმიური ტექნოლოგიის ან რომელიმე მონათესავე დარგის მუშაკი ფიზიკური პირი.

4.2 ასოციაციაში ასოცირებული წევრის სტატუსით შეიძლება გაწევრიანდეს ნებისმიერი დარგის სპეციალისტი ფიზიკური პირი.

4.3 ასოციაციის კორპორატიული წევრია პირი, რომელიც გაწევრიანებულია ასოციაციაში შემავალ ორგანიზაციაში ან საზოგადოებაში. ასოციაციის კორპორატიული წევრი სარგებლობს ასოციაციის წევრის უფლება-მოვალეობებით.

4.4 ასოციაციის წევრი შეიძლება გახდეს სამეცნიერო, საინჟინრო ან სხვა საზოგადოებები და ორგანიზაციები, რომელთა საქმიანობა შეესაბამება ასოციაციის მიზნებსა და ამოცანებს.

4.5 თითოეული ორგანიზაცია, რომელიც შემოდის ასოციაციაში, ინარჩუნებს ორგანიზაციულ და ფინანსურ დამოუკიდებლობას, აქვს წესდება, რომელიც არ ეწინააღმდეგება ასოციაციის წესდებას, და ასოციაციასთან დამოკიდებულებას ანხორციელებს ხელშეკრულების საფუძველზე.

4.6 ასოციაციაში სტუდენტური წევრის სტატუსით შეიძლება გაწევრიანდეს ყველა ის სტუდენტი, რომელიც სწავლობს ქიმიური ან საინჟინრო-ქიმიური სპეციალობის სწავლების ნებისმიერ საფეხურზე. სტუდენტური წევრობა უქმდება სტუდენტის სტატუსის შეწყვეტისთანავე.

4.7 ასოციაციის წევრობის კანდიდატმა ასოციაციის გამგეობაში უნდა წარადგინოს შესაბამისი განცხადება და ორი სარეკომენდაციო წერილი, გაცემული ამ ასოციაციის გამგეობის წევრის ან სხვა საერთაშორისო, ანალოგიური ან მონათესავე პროფესიული საზოგადოების წევრის მიერ.

4.8 ასოციაციაში გაწევრიანებაზე დადენილება გამოაქვს ასოციაციის გამგეობას.

4.9 ასოციაციის წევრის უფლებამოსილება წყდება:

- (a) საკუთარი განცხადების საფუძველზე;
- (b) გამგეობისათვის წინასწარი შეტყობინების გარეშე საწევრო შენატანის ზედიზედ 12 თვის გადაუხდელობის შემთხვევაში;

- (c) ასოციაციის გამგეობის გადაწყვეტილებით, იმ შემთხვევაში თუ მისი საქმიანობა ეწინააღმდეგება ასოციაციის მიზნებს ან იგი არღვევს მასზე დაკისრებულ უფლება-მოვალეობებს;
- (d) სასამართლოს გადაწყვეტილებით მისი ქმედითუნაროდ ცნობისას;
- (e) გარდაცვალებისას.

4.10 ასოციაციის წევრი ორგანიზაციის ასოციაციიდან გასვლის საკითხი წყდება ასოციაციის გამგეობის გადაწყვეტილებით. იმ შემთხვევაში თუ ასოციაციის წევრი ორგანიზაცია წყვეტს არსებობას, მისი წევრობა ასოციაციაში წყდება ავტომატურად, რის შესახებაც ინფორმაცია მიეწოდება ასოციაციის გამგეობას.

მუხლი 5. წევრთა უფლება-მოვალეობანი

5.1 ასოციაციის წევრი უფლებამოსილია:

- (a) მონაწილეობდეს ასოციაციის საერთო კრების მუშაობაში;
- (b) აირჩიოს და არჩეულ იქნეს ასოციაციის მმართველობის ორგანოებში;
- (c) კვალიფიკაციისა და შესაძლებლობების შესაბამისად მონაწილეობდეს ასოციაციის პროგრამებში;
- (d) სათათბირო ხმის უფლებით მონაწილეობდეს გამგეობის სხდომებში;
- (e) მიიღოს ყოველგვარი ინფორმაცია ასოციაციის ხელმძღვანელი ორგანოებისა და პირებისაგან ასოციაციის საქმიანობის შესახებ;
- (f) ასოციაციის მიზნების შესაბამისად, შესაძლებლობის ფარგლებში, ისარგებლოს ასოციაციის საკუთრებაში არსებული ინფორმაციით და მატერიალურ-ტექნიკური საშუალებებით;
- (g) ატაროს ასოციაციის ემბლემა.

5.2 ასოციაციის წევრი მოვალეა:

- (a) დაიცვას ასოციაციის წესდება, შინაგანაწესი და მმართველი ორგანოების მიერ მიღებული გადაწყვეტილებები;
- (b) გაუფრთხილდეს ასოციაციის ღირსებას, ავტორიტეტსა და ქონებას;
- (c) შესაძლებლობებისა და ინტერესების შესაბამისად მონაწილეობდეს ასოციაციის საქმიანობაში;
- (d) პროფესიულ საქმიანობაში იხელმძღვანელოს ასოციაციის მიზნებითა და პროფესიული ეთიკის ნორმებით;
- (e) გადაიხადოს საწევრო შესატანი დადგენილი წესითა და ოდენობით;

- (f) ასოციაციის საშუალებით დაიცვას თავისი უფლებები და ინტერესები სახელმწიფო ხელისუფლების და მართვის ორგანოებში;
- (g) ასოციაციაში წარადგინოს პროექტები და წინადადებები ამა თუ იმ საკითხებზე და მონაწილეობა მიიღოს მათ განხილვასა და განხორციელებაში;
- (h) შეასრულოს ასოციაციის მმართველი ორგანოების გადაწყვეტილებანი, რომლებიც მიღებულია ასოციაციის წესდების შესაბამისად და არ ეწინააღმდეგება მათ უფლებებს;
- (i) ასოციაციის ჩარჩოებში განავითაროს თანამშრომლობა სხვა ორგანიზაციებთან და გაერთიანებებთან;

მუხლი 6. საერთო კრება

6.1 ასოციაციის უმაღლესი ხელმძღვანელი ორგანოა ასოციაციის წევრთა საერთო კრება, რომელიც მოიწვევა გამგეობის მიერ და ტარდება ყოველი წლის ოქტომბერში.

6.2 საერთო კრების დღის წესრიგში წესდების ცვლილებების საკითხის შეტანას წყვეტს გამგეობა, გარდა იმ შემთხვევებისა, როდესაც ცვლილებებისა და დამატებების პროექტი წარდგენილ იქნა ასოციაციის წევრთა ერთი მეთედის მოთხოვნით.

6.3 საერთო კრება უფლებამოსილია, თუ მას ესწრება წევრთა 1/4. საერთო კრება გადაწყვეტილებებს იღებს დამსწრეთა უმრავლესობით, თუ წესდებით ან კანონით სხვა რამე არ არის გათვალისწინებული. ყოველ წევრს აქვს ერთი ხმა. ხმის გადაცემა დაუშვებელია.

6.4 საერთო კრება:

- (a) დამსწრეთა ორი მესამედის უმრავლესობით იღებს ასოციაციის წესდებს და ცვლილებები შეაქვს მასში;
- (b) ფარული კენჭისყრით დამსწრეთა ფარდობითი უმრავლესობით ირჩევს გამგეობის წევრებს. ხმების თანაბრად გაყოფის შემთხვევაში იმართება წილისყრა;
- (c) ისმენს ასოციაციის საქმიანობისა და ფინანსურ ანგარიშს;
- (d) დამსწრეთა უმრავლესობით ამტკიცებს გამგეობის მიერ წარმოდგენილ ასოციაციის საქმიანობის სტრატეგიულ მიმართულებებს;
- (e) დამსწრეთა უმრავლესობით 4 წლის ვადით ირჩევს ასოციაციის სარევიზიო კომისიას;
- (f) დამსწრეთა ორი მესამედით იღებს გადაწყვეტილებას ასოციაციის რეორგანიზაციის შესახებ;
- (g) წევრთა ოთხი მეხუთედით იღებს გადაწყვეტილებას ორგანიზაციის თვითლიკვიდაციის შესახებ;
- (h) წევრთა 3/4 -ით იღებს გადაწყვეტილებას წევრის ასოციაციიდან გარიცხვის შესახებ.

6.5 რიგგარეშე საერთო კრება მოიწვევა ასოციაციის გამგეობის მიერ:

- (a) საკუთარი ინიციატივით;

- (b) თავმჯდომარის ან ასოციაციის წევრთა მეათედის მოთხოვნით, ასეთი მოთხოვნის წარდგინიდან არა უგვიანეს ორი თვისა;
- (c) სარევიზიო კომისიის ინიციატივით.

მუხლი 7. ხელმძღვანელობა და წარმომადგენლობა

- 7.1 ასოციაციის ხელმძღვანელობისა და წარმომადგენლობის უფლებამოსილებას ანხორციელებს ასოციაციის თავმჯდომარე ერთპიროვნულად, ხოლო მისი არყოფნის შემთხვევაში – მისი მოადგილე.
- 7.2 ასოციაციის გამგეობის თავმჯდომარე და სპეციალური წარმომადგენელი ასოციაციის საქმეებს უნდა უძღვებოდნენ კეთილსინდისიერად. ისინი ასოციაციისათვის მიყენებული ზიანისათვის პასუხს აგებენ მის წინაშე სოლიდარულად.

მუხლი 8. გამგეობა

- 8.1 ასოციაციის ხელმძღვანელი ორგანოა 11 წევრისაგან შემდგარი ასოციაციის გამგეობა, რომლის წევრებსაც ოთხი წლის ვადით ირჩევს საერთო კრება. გამგეობის წევრად შეიძლება აირჩეს ის პირიც, რომელიც არ იმყოფება საერთო კრებაზე, თუ არსებობს მისი წინასწარი წერილობითი თანხმობა გამგეობის წევრად არჩევის თაობაზე.
- 8.2 გამგეობის სხდომები იმართება ყოველი კენტი თვის ბოლო კვირაში. რიგგარეშე სხდომა მოიწვევა ასოციაციის თავმჯდომარის მიერ საკუთარი ინიციატივით ან გამგეობის წევრთა ერთი მესამედის მოთხოვნით.
- 8.3 გამგეობა უფლებამოსილია, თუ სხდომას ესწრება წევრთა ნახევარზე მეტი.
- 8.4 გადაწყვეტილება მიიღება დამსწრეთა უმრავლესობით, თუ წესდებით სხვა რამ არ არის გათვალისწინებული.
- 8.5 გამგეობის წევრებს და ასოციაციის ტერიტორიული და სხვა სტრუქტურული ერთეულების ხელმძღვანელებს გამგეობის სხდომის ჩატარების თარიღისა და დღის წესრიგის შესახებ ეცნობებათ 7 დღით ადრე მაინც, ხოლო რიგგარეშე სხდომის მოწვევის შემთხვევაში - დაუყოვნებლივ.
- 8.6 გამგეობა:
 - (a) გამგეობის წევრთაგან ფარული კენჭისყრით ირჩევს ასოციაციის თავმჯდომარეს; თავმჯდომარის წარდგინებით გამგეობის წევრთაგან ფარული კენჭისყრით ირჩევს მის მოადგილეს;
 - (b) იწვევს და ატარებს საერთო კრებას, კრების თარიღისა და დღის წესრიგის შესახებ ორი კვირით ადრე მაინც აცნობებს ასოციაციის წევრებს;
 - (c) ასოციაციის წესდებაში ცვლილებებისა და დამატებების პროექტს საერთო კრებისათვის წარსადგენად აქვეყნებს კრებამდე ერთი თვით ადრე;

- (d) ფარული კენჭისყრით, წევრთა უმრავლესობით წყვეტს ასოციაციის წევრად მიღების საკითხებს;
- (e) სარეკომენდაციო წერილით მიმართავს ასოციაციის იმ წევრს, რომლის საქმიანობაც ეწინააღმდეგება ასოციაციის მიზნებს ან რომელიც უხეშად არღვევს წესდებით მასზე დაკისრებულ მოვალეობებს;
- (f) ადგენს წევრობის მსურველებთან და წევრებთან ურთიერთობის წესს;
- (g) შეიმუშავებს და საერთო კრებას დასამტკიცებლად წარუდგენს ასოციაციის საქმიანობის სტრატეგიულ მიმართულებებს;
- (h) ამტკიცებს ასოციაციის მიერ გაწეული საქმიანობისა და ფინანსურ ანგარიშს საერთო კრებისათვის წარსადგენად;
- (i) ამტკიცებს ასოციაციის სტრატეგიული განვითარების გეგმასა და საბიუჯეტო პარამეტრებს;
- (j) წყვეტს ასოციაციის რეგისტრირებულ ორგანიზაციებში წევრობის, აგრეთვე იურიდიული პირის დაფუძნებაში მონაწილეობის საკითხს;
- (k) თავმჯდომარის წარდგინებით ამტკიცებს ასოციაციის ორგანიზაციულ სტრუქტურას;
- (l) ირჩევს ასოციაციის ბეჭდვითი და ელექტრონული (ვებ-გვერდი) ორგანოს სარედაქციო საბჭოს;
- (m) თავმჯდომარის წარდგინებით იღებს გადაწყვეტილებებს ასოციაციის რეგიონული ერთეულების შექმნისა და გაუქმების შესახებ, ამტკიცებს მათ დებულებებს და ხელმძღვანელებს;
- (n) ფარული კენჭისყრით წევრთა სიითი უმრავლესობით თანამდებობიდან გადააყენებს ასოციაციის თავმჯდომარეს და მის მოადგილეს;
- (o) აფუძნებს ასოციაციის საწარმოებს და ასოციაციის თავმჯდომარის წარდგინებით ნიშნავს და ანთავისუფლებს მათ ხელმძღვანელებს;
- (p) წყვეტს სხვა საკითხებს, რომლებიც ამ წესდებით არ განეკუთვნება საერთო კრებისა და სხვა მმართველი ორგანოების კომპეტენციას.

8.7 გამგეობის წევრის უფლებამოსილების ვადაზე ადრე შეწყვეტის შემთხვევაში გამგეობის წევრი ხდება ის პირი, რომელმაც დააგროვა ხმათა მეტი, მაგრამ გამგეობის წევრად არჩევისათვის არასაკმარისი რაოდენობა უკანასკნელ საერთო კრებაზე. თანაბარი ხმების მქონე პირთაგან გამგეობის წევრი შეირჩევა გამგეობის მიერ ჩატარებული წილისყრით. ახლად არჩეული გამგეობის წევრი უფლებამოსილებას ანხორციელებს გამოკლებული გამგეობის წევრის უფლებამოსილების დარჩენილი პერიოდის განმავლობაში.

8.8 ასოციაციის წევრობის შესასვლელი და წლიური შენატანების ოდენობა იურიდიული პირებისათვის (კოლექტიური წევრებისათვის) დგინდება ურთიერთშეთანხმების საფუძველზე ყოველ ცალკეულ შემთხვევაში. ასოციაციის საწევრო შენატანის ოდენობას ფიზიკური პირებისათვის და სტუდენტური წევრებისათვის აწესებს ასოციაციის გამგეობა. სტუდენტური წევრობის საწევრო შენატანი არ უნდა აღემატებოდეს საწევრო შენატანის 50%-ს.

მუხლი 9. თავმჯდომარე

9.1 ასოციაციის თავმჯდომარეს და მის მოადგილეს თავის წევრთაგან ოთხი წლის ვადით ირჩევს გამგეობა მორიგი საერთო კრების შემდეგ პირველსავე სხდომაზე. თავმჯდომარის კანდიდატურის წამოყენების უფლება აქვს გამგეობის ყოველ წევრს. ახლად არჩეული თავმჯდომარე ასახელებს თავისი მოადგილის კანდიდატურას. ასოციაციის თავმჯდომარისა და მოადგილის უფლებამოსილება იწყება არჩევის მომენტიდან და გრძელდება შესაბამისად ახალი თავმჯდომარისა და მოადგილის არჩევამდე. საერთო კრების შემდეგ თუ თავმჯდომარე და მოადგილე, ახალი თავმჯდომარის და მოადგილის არჩევამდე ვერ ასრულებენ თავიანთ უფლებამოსილებას, ასეთ შემთხვევაში მათი ფუნქციების შესრულება დაევალოს გამგეობის უხუცეს წევრს.

9.2 თავმჯდომარე:

- (a) წარმართავს ასოციაციის საქმიანობას საწესდებო მიზნების მისაღწევად;
- (b) ხელმძღვანელობს გამგეობის საქმიანობას და უძღვება მის სხდომებს;
- (c) წარმოადგენს ასოციაციას სხვა პირებთან ურთიერთობაში;
- (d) წყვეტს ასოციაციის კონკრეტული მიზნით შექმნილ კოალიციებში გაერთიანების საკითხს და ამის შესახებ აცნობებს გამგეობის წევრებს;
- (e) ზედამხედველობს ასოციაციის ფინანსური სახსრებისა და სხვა მატერიალური ქონების მართვას;
- (f) უძღვება ასოციაციის წევრებთან და წევრობის მსურველებთან მუშაობას გამგეობის მიერ დადგენილი წესით;
- (g) ხელს აწერს ასოციაციის ოფიციალურ დოკუმენტებს;
- (h) გამგეობის მიერ დადგენილი წესით განკარგავს ასოციაციის ფულად სახსრებსა და მატერიალურ რესურსებს და პასუხისმგებელია მათ სწორ გამოყენებაზე, ხელს აწერს შესაბამის ოფიციალურ და საფინანსო დოკუმენტაციას;
- (i) გამგეობას დასამტკიცებლად წარუდგენს ასოციაციის ორგანიზაციულ სტრუქტურას;
- (j) ასრულებს ამ წესდებით მასზე დაკისრებულ სხვა ფუნქციებს.

9.3 მოადგილე თავმჯდომარის რწმუნებით ასრულებს თავმჯდომარის მოვალეობას თავმჯდომარის მიერ განსაზღვრულ უფლებამოსილებების ფარგლებში. ასოციაციის თავმჯდომარის გადადგომის შემთხვევაში ახალი თავმჯდომარის არჩევამდე თავმჯდომარის ფუნქციებს ასრულებს მისი მოადგილე.

9.4 თავმჯდომარის (მოადგილის) უფლებამოსილების ვადამდე შეწყვეტა მის მიერ წესდებით განსაზღვრული მოვალეობების შეუსრულებლობის, უფლებამოსილების გადამეტების ან ასოციაციის საწესდებო მიზნებთან შეუსაბამო საქციელისათვის შეუძლია მხოლოდ გამგეობას. ასეთ შემთხვევაში გამგეობა ერთი თვის ვადაში ირჩევს ახალ თავმჯდომარეს (მოადგილეს) დარჩენილი ვადით.

მუხლი 10. სარევიზიო კომისია

10.1 ასოციაციის თავმჯდომარის, გამგეობის და მათ მიერ დანიშნული (დამტკიცებული) თანამდებობის პირების მიერ ასოციაციის წესდების შესრულებისა და ფინანსური სახსრების თუ სხვა ქონების საწესდებო მიზნების შესაბამისად გამოყენებაზე კონტროლს ანხორციელებს ასოციაციის სარევიზიო კომისია, რომელსაც ოთხი წლის ვადით ხუთი წევრის შემადგენლობით ირჩევს საერთო კრება. სარევიზიო კომისია არჩევიდან ერთი თვის განმავლობაში საკუთარ წევრთაგან ირჩევს თავმჯდომარეს. სარევიზიო კომისია მუშაობს მის მიერ შემუშავებული რეგლამენტით.

10.2 სარევიზიო კომისიაში შემავალი პირი იმავდროულად არ შეიძლება იყოს ასოციაციის გამგეობის წევრი.

10.3 სარევიზიო კომისია 6 თვეში ერთხელ მაინც აწყობს საფინანსო-საბუღალტრო დოკუმენტების რევიზიას და მატერიალურ ფასეულობათა ინვენტარიზაციას. რევიზიის შედეგები მოხსენდება გამგეობასა და მორიგ საერთო კრებას. სარევიზიო კომისია გადაწყვეტილებებს იღებს ხმათა უმრავლესობით.

10.4 სერიოზული დარღვევების გამოვლენის შემთხვევაში სარევიზიო კომისია იწვევს გამგეობის რიგგარეშე სხდომას ან რიგგარეშე საერთო კრებას და გაუძღვება მას.

10.5 სარევიზიო კომისიის წევრის უფლებამოსილების ვადაზე ადრე შეწყვეტის შემთხვევაში კომისიის წევრი ხდება ის პირი, რომელმაც დააგროვა ხმათა მეტი, მაგრამ სარევიზიო კომისიის წევრად არჩევისათვის არასაკმარისი რაოდენობა უკანასკნელ საერთო კრებაზე. თანაბარი ხმების მქონე პირთაგან სარევიზიო კომისიის წევრი შეირჩევა კომისიის მიერ ჩატარებული წილისყრით. ახლად არჩეული სარევიზიო კომისიის წევრი უფლებამოსილებას ანხორციელებს გამოკლებული კომისიის წევრის უფლებამოსილების დარჩენილი პერიოდის განმავლობაში.

მუხლი 11. მრჩველთა საბჭო

11.1 ასოციაციის საკონსულტაციო ორგანოა გამგეობის მიერ შექმნილი ასოციაციის მრჩველთა საბჭო. საბჭოს საქმიანობის წესი განისაზღვრება დებულებით, რომელსაც ამტკიცებს გამგეობა. მრჩველთა საბჭო თავისი შემადგენლობიდან ირჩევს საბჭოს თავმჯდომარეს.

მუხლი 12. ასოციაციის ქონება

12.1 ასოციაციის ქონება იქმნება საწევრო შენატანების, წევრთა და სხვა პირთა შემოწირულობების, გრანტების, დამხმარე სამეწარმეო საქმიანობითა და სხვა კანონიერი გზით მიღებული შემოსავლებისაგან.

12.2 ასოციაციის ქონება შეიძლება მოხმარდეს მხოლოდ მისი საწესდებო მიზნების განხორციელებას.

მუხლი 13. ასოციაციის საქმიანობის შეწყვეტა

13.1 ასოციაციის საქმიანობის შეწყვეტა (გაუქმება) ხდება შემდეგ შემთხვევებში:

- (a) ასოციაციის საერთო კრების გადაწყვეტილებით;

(b) საქმის წარმოების გახსნის ან რეგისტრაციის გაუქმების შემთხვევაში;

(c) კანონმდებლობით გათვალისწინებულ სხვა შემთხვევებში.

13.2 ლიკვიდაციის დამთავრების შემდეგ დარჩენილი ქონება გადაეცემა იმავე ან მსგავსი მიზნების სხვა არასამეწარმეო იურიდიულ პირს ასოციაციის გამგეობის გადაწყვეტილების საფუძველზე.